

四庫全書

史部

欽定四庫全書

史部

雲南通志卷二十九之十三

詳校官給事中臣李臺

刑部郎中臣許兆椿覆勘

總校官知縣臣楊懋珩

校對官典簿臣汪日贊

謄錄監生臣李玉璜

欽定四庫全書

雲南通志卷二十九

詩

古歌謠

漢

渡蘭滄歌

水經注漢明帝時通博南山道渡蘭津行者苦之歌曰

雲德廣開不賓度博南越蘭津渡蘭滄為他人

渡道謠

孟州記曰瀘水源出曲羅兩峯有殺氣暑月舊不行故武侯以夏渡為艱瀘水又下

合諸水而總其目故有瀘江之名自朱提至樊道有黑水羊官三津之阻行者苦之為之語曰

猶溪潁木盤蛇七曲盤羊烏龍氣與天通

四言古

晉

述南中志

常璩蜀郡

赤德中微巨猾干篡白夷乘釁致民塗炭爰迄靈獻皇極不建牧后失圖英雄迭進覆車齊軌蒙此艱難

五言古

唐

臨水亭

舊志相傳為寓蒼洱作不知何據姑存之

博士

閻邱均

成都

高館基層山幕坐藉芳草旁對野村樹下臨車馬道清
朗娛心術幽遐備瞻討回合峯隱雲聯綿渚縈島氣似
滄洲勝風為青春好相及勝年時無令歎衰老

古風

翰林

李

白山東

羽檄如流星虎符合專城喧呼救邊急羣鳥皆夜鳴白
日照紫微三公運權衡天地皆得一澹然四海清藉問

此何為答言楚徵兵渡瀘及五月將赴雲南征怯卒非
戰士炎方難遠行長號別嚴親日月慘光晶泣盡繼以
血心摧兩無聲困獸當猛虎窮魚餌奔鯨干去不一回
投軀豈全生如何舞干戚一使有苗平

同諸公送李宓雲南伐蠻

御史 儲光義

昆明濱滇池蠢爾敢逆常天星耀鐵鎖帛彼西南方總
宰統元戎太守齒軍行囊括千萬里矢謨在廟堂耀耀
金虎符一息到炎荒蒐兵自交趾茆舍出瀘陽羣山高

嶄巖凌越如鳥翔封豕驟跼伏巨象遙披攘迴溪深天
淵揭厲逾舟梁元武掃狐蜮蛟龍除方良雷霆隨神兵
礪磕動穹蒼斬伐若草木繫縲同豕羊餘醜飲彌河啁
啾亂行藏君子惡薄險王師恥重傷廣車設置罌太白
收光芒邊吏靜縣道新書行紀綱劍關掉鞅歸武弁朝
建章龍樓加命服獬豸擁秋霜邦人頌靈旗側聽何洋
洋京觀在七德休哉我神皇

過遂久縣

劉灣

百蠻亂南方羣盜如蝟起騷然疲中原征戰從此始白
門太和城來往一萬里去者無全生十人九人死代馬
臥陽山燕兵哭瀘水妻行求死夫母行求死子蒼天滿
愁雲白骨積空壘哀哀雲南行十萬同已矣

送袁中丞持節冊南詔五韻

同平章事 權德輿 略陽

西南使星去遠徼通朝聘烟雨隸道深麾幢漢儀盛途
輕五尺險水愛雙流淨上國洽恩波外臣遵禮命離亭
駐紫騮且盡尊中聖

元

碧雞山

鄭衍

中慶西南來有山勢雄奕屏開障大荒壁立數千尺晴
巒疊奇峰幽壑藏怪石清風響松濤老樹森矛戟俯瞰
滇池水仰矗雲山碧山靈得異境廟貌存古跡君侯本
世家奉詔平叛逆茲承寵光行山迎馬首懌鎮遏良有
謀烟瘴似冰釋從此邊陲寧殊勲書竹帛

西蕃箐

學士

張

翥

寧晉

西道出邛僊百里彌菁林俛行不見日刺木鬱蕭森伏
莽有夷獠巢枝無越禽根盤三嶺險氣接西蕃深銀山
雪夏白金沙嵐晝黔主恩畀良帥時平靖蠻心風威所
播灑瘴地空毒淫願言闢南徼蔽以樹棠陰

入霑益亂後傷懷

進士 公孫輔 德陽

驅馬霑益州南望滇海頭向來繁華地變滅如浮漚迥
不見人烟但見河水流青山宛然在風景何蕭颼郡縣
生荆棘汙萊翳田疇夜聽虎豹號晝顧麋鹿遊羣鳥集

戰壘野燐飛林邱灼灼道旁花只為行者愁緬思冠亂
際藩垣失防秋空虛起外侮口語興戈矛盛衰雖天運
禍端亦人謀生靈爾何辜吾欲天公尤

謁蘭滄武侯祠

學士
揭傒斯富州

炎靈壓東都臥龍起南陽漢業入三顧蜀日宣重光豈
伊山川險況在兵刃強八陣通神明二表貫穹蒼天運
有隆替吾君自虞唐煌煌十萬師聲威搖八荒大星殞
渭南萬古一悲傷但使漢賊分安有終不亡桓桓蕭相

軍雙旄出永昌下馬城南池為公酹一觴

滇池

喬堅

滇水不可涉石戟森嵯峨胡能宅蛟龍但可藏鼃鼃渚
風蕩驚湍乃爾泥滓多我欲澄其源應自崑崙阿才謬
諒靡救臨流將奈何商山紫芝曲漁父滄浪歌斯人久
不作千載無清波

明

蘭滄江

學錄
毛鉉

兩山高插雲歸然若天岸草樹綠相繆仰視天一線中
有一長江江流急於箭亂石齟其中噴激成飛霰客子
何問津雞鳴夜將旦僕夫相顧愁舟楫恐失援天明涉
此險永作邊城翰

蕉洞

幽幽小洞天沉沉若隧道石門古莫扃石磴淨於掃石
花三月開色比桃李好人爭秉燭觀過此即枯槁既非
人技為無乃天所造况無鐫鑿痕此理不可曉

贈楊寧征麓川

大學士楊士奇廬陵

楊生青雲客文彩耀白壁腰閒龍泉劍別我有遠適吾
聞禹徂征舞干致苗格所以宣尼訓服遠修文德好謀
而有成明明垂警飭如何才智士宏議薄古昔懷忿忽
遠圖急功幸苟得寧論萬里行糗糧豫儲積漢廷所遣
將孰是趙充國子行職贊襄龜勉攄良畫雖有斗酒餞
安能寫胸臆

仙樂臺

金事孟 霽澤州

山郭朝雨餘青蕪連野路期與高人遊籃輿西北驚蒼
山亂雲間隱隱鐘聲度危塔出層霄金壇灑香霧久厭
冠簪累禪林時信步碁局傍晴軒茶烟穿竹樹頗得靜
者心安知白日暮常此坐觀空迷方倘能悟

大觀樓

副使 趙維垣 永寧

我從哀牢來鳥譚連亭障一望櫟榆城宇宙何昭曠瑤
峯冠白雲金魚分玉浪岫虎川途暉濤鷺風烟向豈羨
方壺遊可使天台讓元聖心幽馮海若亦飈蕩吾欲問

山靈無言空罔象但覩巖壑閒森森釋門傍

青元洞

參政馬卿林縣

夙昔慕仙侶採藥尋名山蓬瀛殊恍惚勝境自人寰世
網猶未脫遙遙謫南蠻簿領日紛糾春風偶餘閒巡行
歷阡陌登遊遍林巒山椒洞門啓玲瓏彩雲閒奇石狀
厖泉斧鑿羞垂班天光牖虛白月窟浮清潺珠璣瑱乳
綴綺繡壁苔斑儼然清華境寸碧出雲鬟果有笙鶴翁
霞髦何爛熳遺我金簡書兼之白玉環環以象太極書

以示九還謂勛松栢心無為桃李顏再拜感至教脩舉
不可攀仙路豈云遠煉修良匪艱矢心斷金石常恐芳
歲殘紅塵落已久丹書幾時頒願言達精誠排雲叩天
關

元謀縣歌

修撰
楊慎
新都
謫戍

遙見元謀縣塚墓何累累藉問何人墓官尸與吏骸山
川多瘴癘仕宦少生回三月春草青元謀不可行九月
草交頭元謀不可遊嗟爾營營子何為歛來此九州幸

自寬何為此遊盤

采蘭引

廣通縣東響水關產蘭綠葉紫莖春華秋馥蓋
楚騷所稱細佩之蘭也人家盆植如蒲萱者蓋
蘭之別種曰蓀與芷耳時川姜子見而采以贈
予知九畹之受誣千載矣一旦而雪作采蘭引

秋風衆草歇叢蘭揚其香綠葉與紫莖猗猗山之陽結
根不當戶無人自芬芳密林交翳翳鳴泉何湯湯欲采
往無路跼步愁褰裳美人馳目成要予以昏黃山谷歲
復晚修佩為誰長採芳者何人蓀芷其升堂徒令楚老

惜坐使宣尼傷感此興中懷弦琴不成章

謁二忠祠

大學士夏言貴溪

朝出南城門望見城南祠含悽眺田野灑淚升堂基棟
宇何戕戕松栢森前墀言念二君子皎皎雙玉枝聖皇
啓初運元孽據滇池銜命屬後先仗節死一時義氣奮
殊俗英聲動邊陲列聖眷明德憲臣繼陳辭褒揚錫異
典記述磨穹碑余奉萬里役弭節昆明涯弔往有深感
感今重遐思道消仁義捐俗降節槩虧洵濤蕩激中見

此千仞崖疾風轉高蓬勁草終弗移斯人久徂謝俎豆
光陸離榮名豈終極天枉奚足悲

飛來寺

提學
胡堯時泰和

行過飛來寺逶迤趙州路忽見點蒼山飄焉神與驚巖
嵌雪未消峯高鳥難度安潤青芙蓉長日生雲霧睽茲
千仞崗誰能振高步人生嗟如鳩結巢簷下樹不極高
與明栖栖空旦暮

半閒亭

知府
章士元蘇州

昔賢理彭澤託迹東西林豈繫耽名教實寄方外心余
質本樗散黽勉嬰紱簪西南繫一郡綿力苦不任徵科
與敲扑填此煩冤襟爰追昔人意佳境還招尋邂逅入
精廬幽賞愜孤吟曇花爭永晝香燈散秋陰夷猶未成
久瀟灑良獨深乘興數來往挈榼聊自斟同行盡案服
相懽各矢音如知會心處無閒古與今倏忽歲云改庭
柯鬱森森未諧結廬願有懷春江潯悵此羈旅迹繾綣
空蹄涔何當返初服一臥吳山岑

白水關驛對月

參議

馮時可

華亭

淺山曳輕雲茂林鬱深碧夜氣涼如水當窗迎皓魄露
華洗空氣清暉流几席已欣鳥道脫尚恨鴛樓隔抱影
獨寤寐銜恩感今昔天宇本自寬人生胡自窄萬里遊
亦奇百城臨且適當劇即程書乘閑亦振屐悠然如在
林孤臣何跼蹐

飲朝霞漫興

知府

黃兆隆

陰晴互朝昏氣候靡有定春半尚餘寒未愜登山興偶

辱翩翩賢邀遊招提境出郭適清和日淡纖雲淨梨開
白盈枝桃飛紅滿徑芸芸麥正芳嚶嚶鳥相應厯壑既
經邱穿林復陟磴望望詣朝霞果然三界勝縱目萬象
空身如超上乘澗水浮閑花禪堂發孤磬亭亭古柏陰
落落長松勁碧繡綠蘿懸石冷香泉迸入門供帳繁綺
筵笙歌併且盡主人情不問山僧姓更有同心儔元談
時印證披豁見天真銜杯不欲醒自苦俗吏忙得此歡
懷罄留連光景遲收拾無餘剩臨風咏歸來天外紫烟

暝

望雪山

參政
謝肇淛

晉江

山行數百里貿貿靡所屆迴上四盤坡我馬痛以憊千
峰繞翠屏驚見玉龍挂爛如白芙蓉橫聳青天外斜日
正照耀銀宮起光怪皓質互四時千秋復萬代元鶴不
敢棲路草綠映帶永懷面壁踪結想香林界坐令俗骨
清頓覺神情快安得馭冷風凌虛飲沆瀣

蘭津渡

巡按
鄧漢

新城

冒險戒征鞍行色委空翠回飈引去旌迤邐向虛絕峭
壁倚雄峙長江貫澎湃虹梁跨飛動鮫宮審所寄地維
恐中陷日車側引避石古霜華明天寒岸陰悶靜聞饑
鶻嘯遽疑飛雨至客魂驚始定幽光屢睴眙南登蜀相
祠英風此未墜

行部迤東西輶中雜述二首

策馬登山椒下有古時邱灌莽翳縱橫雀聲鳴啾啾井
竈已蕪沒碑版尚可求夷俗每下拜行人為涕流藉問

何代賢乃是武鄉侯當時行軍營遺名至今留攻心得
上策南人戢狂謀板蕩英略顯承平士習偷武定既餘
孽隴川未俘酋疥癬何足言樽俎無勝籌桓桓介冑士
坐貽巾幗羞憑軾想精靈徒此仰令猷九原如可作微
公誰與遊

出自郭北門有叟泣路隅自言賈人子少小工廢居北
走邯鄲道南遊歷勾吳貲給幸益饒斥買盡膏腴長子
獄小吏次子業為儒幼子獨無事跼踖竝樗蒲齋貸遍

貧人頗獲鄉曲譽鞍馬溢街巷出入閑且都轉盼十載
閒人事有盈虛長子死虐璫告密橫見誅前歲武定變
次子復被屠幼子無警省門戶轉蕭疎府帖召買金里
胥迫相呼忍淚遣之行遠販豺虎區經年絕還期瘦軀
知在無公家有程限官法嚴追逋朽老甘痛楚鞭撻無
餘膚廢箸不足償歸賣婢與奴羅紈昔盈箱今也婦無
襦殘年復餘幾委骨終溝渠語竟淚簌簌聞者亦歛歔
藏金著古訓改玉欽令圖德音沛早晚忍死且須臾

華藏寺

梁州仲冬月氣候如秋早憂俗省煩督乘閒恣幽討鳴
笳越修阪停車渡清潦攀林踐香界漸近山更好斲翠
開筠房疏碧架蘭橈銀榜倚虛壁紅亭映深島濫泉珠
自瀉雜英霰微冒回飈蕩松林蒼翠若可掃山果摘霜
橘蔬食甘蕕藻跼俗鮮勝韻遺榮得曠抱去岱久已審
懸車豈待老

武定變

朝登武定城暮宿抵羅次有何龐眉叟遮車泣訴事問
叟何所苦問叟何所覲叟耄復健忘憶一不記二往者
萬厯初邊守幸康又守令咸得人民物鮮札厲伍伯不
到門什一有恒稅斗米纔十錢半鋸易一醉龜貝自轉
輸工價集駢坐相歡太平人但供角觥戲嗚呼廿載間
乾坤一幽閉中丞文且武抵掌談封拜羽檄豈虛來兵
革靡寧歲忍以百萬命而快一人意忍白千里地而希
茅土賜守臣本蠹賊中璫甚狂獬此輩紈袴子况彼糞

除隸咆哮而負隅逢者鮮不噬不忍因民怨奈何虎冠
吏一夫敢倡難餘孽竟昌熾謠傳寇初集頗遭守者詈
黽勉授殘甲垂頭望睥睨蜂涌圍已合蟻薄城遂潰巷
戰力不敵免胄期殞碎烈烈金與王闔門竟死義宛轉
蛾眉女慷慨丈夫氣泣抱黃口兒牽挽及娣姒相繼付
烈燄義不汙賊鑽草間苟求活羞彼郡都尉難撲燎原
火易乘破竹勢中丞文且武小醜曾蒂芥下令城中外
毋得輒引避按堵第如故已定退賊計賊來如風雨剝

膚患孔亟晨興牙門啓文武咸就位寇賊在門庭請問
計安出中丞噤無語汗流手顫悸但云烏合衆不久自
當退城外鼓盈天城中哭震地賊徒皆重鎧踉蹌錯其
臂每聞得漢兒刃腹必洞刺刳腸絰樹枝烏鳶下爭食
尸積雲津橋血流滇海澨中丞非不武空拳安可試登
樓望賊徒愞然思所畏或用緩賊謀姑為好語慰彼賊
若罔聞瞋目仍攘袂惡詬至不堪左右皆沮媿甘受城
下盟竊發虞姦細犒用十二牛文錦先皮幣甚紫織成

衣黃金鈎落帶銀印龜形鈕本自上方製名器敢輕假
曾謝挈餅智賊衆始拜舞觀者猶惴惴賊來荷戈入賊
去駝金回可憐窈窕抑作犬羊配虜獲動無算男婦
必累騎輜重百里間綿綿行不絕獬賊固驍悍小勝輒
怛怙中丞文且武開門悉精銳擊歸伺其怠小醜安足
殪但聞攀牆看誰將一矢遺夷民舊部落府主新儀衛
前歌後有舞送歸刺史廨昭昭漢日月幾向蠻天墜忍
死幸須臾延頸王師至焚香拜馬首雙頰如雨淚不意

溝壑軀復覩漢旌幟感激活我恩人持一筭餌長跼主
帥前帥聞乃大許怒聲吼如雷立命三軍士居此圍城
中盡與賊勾結從賊有顯戮任其所斬刈軍士擁向前
兩手捽其髮舉刀便欲斫觀者但睜眦叩頭連乞命我
輩有何罪爾輩實無罪是爾命盡日昨傳中丞令首開
購級例重賞不踰時以此競趨利按賊無所得失利且
有害頭顱許借我誰能別真偽老幼聞此言號擗淚盈
皆生既無門控死當訴上帝駢首就鋒刃流血如泉沸

次第列功狀報捷日三四中丞啓捷書抵掌大稱快催
軍益前進功多賞亦倍傳教諸將營努力功名會今年
殺諸賊金印如斗大當取懸肘後急擊慎勿失天網恢
恢布多殺神所忌逆賊既就俘將吏亦被逮糜爛同一
理誰逃百六阨叟昔有三子諸孫繞膝嬉酷經喪亂來
竝無髻鬣嗣田園既蕪沒居室遭焚燹親友凋殘盡生
理迷所寄人皆羨高年高年有顛顚歎息老叟語停鞍
重歎歎召變良有初妖象著為彗町疇作戰場噫嘻豈

偶值

易隆驛

知府

周仕國

普安

為吏不自由雞鳴戒前途問君何為爾將事謁且趨上
官前導至走馬臨長衢馬上極咆哮風火不停驅盡欲
飽其腹遲則生禍虞昨日郵書至為言餉傳逋疲卒八
九家形影半凋枯門戶塞荆棘妻子匿菰蘆苦稱被水
旱畝地盡荒蕪僅餘皮骨在典鬻無完膚詔使日夜至
愷澤同春敷而我獨重困何以偷須臾倉卒感斯言仰

天長歎歎攬衣亟起去耳中聞追呼

九鼎山

知府陳筭產銅仁

佛初不住寺古穴蔽巖篠化身那知年深洞詎覺曉遠
公倚空虛淨室凌縹緲飛樓挂花棚石磴上不了尋到
巖路窮方達僧居嶮傍花方丈幽共坐蒲團小人語出
雲竇鐘聲低樹杪問師悟何時雲破山月皓

哀夏呈貢祖訓

知縣黃孔昭吳縣

夏君一命均奉檄入荒徼合并五華寺杯酒共吟眺丈

夫慨以慷風雲坐談笑何期受重圍一死臣節效更無
黃犢賣路有青蠅弔碧血何處藏寒原走殘燒

本朝

交水

同知
姚文燮
桐城

山勢不在高恢弘氣彌壯險夷造化心縈盤審趨向千
崖積重翠已盡物類狀修垌變層岑廬舍成倚傍流景
自容與縈情謝感愴綠疇帶清湍犴犢恣牧放撫膺耕
原田元氣復凋喪譬登衽席初雖癯神已王相形息爭

觸自易興禮讓三江匯衆溪漣漪遶秋嶂遙雲不斷青
似此復何悵

萬松庵

知縣
張端亮

蒙化

台山望無際庵在山之趾冷然一壑松萬松豎如指老
蛟攫流雲穉龍浴清泚尋徑造香林叩扉松樹裏壁嵌
古銅青石點苔花紫僧不厭客來客亦愛僧止枯茗豁
疎襟談深悟無始日落聽昏鐘一天清梵起

法界寺雅集用禪房花木深為韻和賴庵吳學使

之作

總督

尹繼善

滿洲

恰值春歸日桃李又爭妍尋幽向山洞步入春煙石
磴盤雲上松梢信手攀青藤纏絕壁小麥遍梯田浮生
閒片刻卻誤老僧禪

節序何時好四野啓青陽仙源流洞口石乳垂山房春
風自南來生意滿巖疆細雨正霏霏大有占農祥龍湫
一水隔登厯更褰裳

小院開樽處殘梅尚有花酒行人半醉香雜樹交加暫

可遠塵俗敢云愛煙霞綠竹誰培植蔓草費搜爬漫將
此中趣輕向外人誇

勝景屢追陪幽林到華轍爾我兩忘形推心每置腹喜
得年歲豐長享太平福歌咏遍溪山清光被草木登臨
日已西歸鞭促僮僕

天涯偶聚首况復是知心古人秉燭遊所惜在光陰歸
林鳴鳥急擁岫暮雲深勗哉崇令德逝者何駸駸三復
吟君詩清風吹我襟

七言古

隋

征南寧夷過石門山

行軍總管 史萬歲 杜陵

石城門峻誰開闢更鼓誤聞風落石界天白嶺勝金湯
鎮壓西南天半壁

唐

軍中行路難

臨海丞 駱賓王 義烏

君不見封狐雄虺自成羣憑深負固結妖氛玉璽分兵

徵惡少金壇授律動將軍將軍擁旄宣廟略戰士橫戈
靜夷落長驅一息背銅梁直指三危登劒閣閣道迢遙
起戍樓劒門搖曳俯靈邱邛關九折無平路江水雙源
有急流征役無期返他鄉歲月晚杳杳邱陵出蒼蒼林
薄遠途危紫蓋峰路澁青泥坂去去指哀牢行行入不
毛絕壁千重險連山四望高中外分區宇夷夏殊風土
交趾枕南荒昆彌臨北戶川原饒毒霧溪谷多淫雨行
潦四時流崩崖千歲古漂梗飛蓬不暫安捫蘿引葛陟

危巖昔時聞道從軍樂今日方知行路難滄江綠水東
流駛炎州丹徼南中地南中南斗映星河秦關秦塞阻
烟波三春邊地風光少五月瀘川瘴癘多朝驅疲斥堠
夕息倦樵歌向月彎繁弱連星轉太阿義重輕生懷一
顧東征西伐凡幾度夜夜朝朝斑鬢新年年歲歲戎衣
故灞城隅滇池水天涯萬轉積地際行無已徒覺炎涼
節物非不知關山千萬里棄置無重陳征行多苦辛且
悅清笳梅柳曲詎憶芳園桃李人絳節紅旗分日羽丹

心白刃酬明主但令一被君王知誰憚三邊征戰苦行
路難幾千端無復歸雲憑短翰空餘望日想長安

天威行

員外

顧雲池州

蠻嶺高蠻海闊去舸迴艘投此歇一夜舟人得夢閒草
草相呼一時發颶風怒起雲顛狂波濤擺掣魚龍殭海
神怕急上岸走山靈股慄入石藏金蛇飛伏霍閃過白
日倒挂金繩長轟轟砢砢雷車轉霹靂一聲天地戰風
走雲開始望看萬里有天才四片車遙遙馬聞聞平如

底直如弦雲南八國萬部落皆知此路來朝天耿恭拜
出井底水廣利刺開山上泉若論終古濟物意二將之
功皆小焉

蠻子朝

尚書

白居易 太原

蠻子朝汎皮船兮渡繩橋來自雋州道路遙入界先經
蜀川過蜀將收功先表賀臣國雲南六詔蠻東連牂牁
西連番六詔星居初瑣碎合為一詔漸強大開元皇帝
雖聖神惟蠻倔强不來賓鮮于仲通六萬卒征蠻一陣

全軍沒至今西洱河岸邊箭孔刀痕滿枯骨誰知今日
慕華風不勞一人蠻自通誠由陛下休明德亦賴微臣
誘諭功德宗看表知如此笑令中使迎蠻子蠻子導從
者誰何摩挲俗羽雙僂伽清平官持赤藤杖大軍將擊
金吐嵯異牟尋男尋閣勸持勅召對延英殿上心貴在
懷遠蠻引臨御坐近天顏冕旒下垂親勞徠賜衣賜食
移時對移時對不可得大臣相看有羨色可憐宰相拖
紫佩金章朝日唯聞對一刻

折臂翁

新豐老人八十八頭鬢鬚眉皆似雪
元孫扶向店前行
左臂憑肩右臂折問翁折臂來幾年
兼問致折何因緣
翁云貫屬新豐縣生逢聖代無征戰
慣聽梨園歌管聲
不識旗槍與弓箭無何天寶大徵兵
戶有三丁點一丁
點得驅將何處去五月萬里雲南行
聞道雲南有瀘水
椒花落時瘴烟起大軍徒涉水如湯
未過十人二三死
村南村北哭啼哀
兒別爺娘夫別妻
皆云前後征蠻者

千萬人行無一回是時翁年二十四兵部牒中有名字
夜深不敢使人知偷將大石鎚折臂張弓簸旗俱不堪
從茲始免征雲南骨碎筋傷非不苦且圖揀退歸鄉土
臂折來經六十年一肢雖廢一身全至今風雨陰寒夜
直到天明痛不眠痛不眠終不悔且喜老身今獨在不
然當時瀘水頭身死魂飛骨不收應作雲南望鄉鬼萬
人塚上哭啾啾老人言君聽取君不見開元宰相宋開
府不賞邊功防黷武又不聞天寶宰相楊國忠欲求恩

幸立邊功邊功未立生人怨請問新豐折臂翁

蠻子朝

同平
章事
元稹
河南

西南六詔有遺種僻在荒陬路尋壅部落支離君長賤
比諸蠻夷為幽冗吐蕃強盛頻侵削降有懼心戰無勇
夜防抄盜保深山朝望烟塵上高塚烏道繩橋來款附
非因慕化因危悚清平官繫金呿嗟求天叩地持雙珙
益州大將韋令公頃實遭時定汧隴自居劇鎮無他績
幸得蠻來固恩寵為蠻開道引蠻朝迎蠻送蠻常繼踵

天子臨軒四方賀朝廷無事惟端拱漏天走馬春雨寒
瀘水飛地瘴烟重椎頭醜類除憂患瘡足役夫勞洶涌
吐蕃互市歲不供雲蠻通好轡長駉戎王養馬漸多年
南人耗賴西人恐

元

雪山

宣慰副使李京河間

麗江雪山天下絕積玉堆瓊幾千疊足盤厚地背摩天
衡華真成兩邱垤平生愛作子長遊覽勝探奇不少休

安得乘風凌絕頂倒騎箕尾看神州

過金沙江

雨中夜過金沙江五月渡瀘即此地兩巖峻極若登天
下視此江如井裏三月頭九月尾烟瘴拍天如霧起我
行時當六月末王事役人安敢避來此滇池至越窩畏
途一千三百里干戈浩蕩虎豹穴晝不遑寧夜無寐憶
昔先帝南征月箏食壺漿竟臣妾撫之以寬來以德五
十餘年為樂國一朝賊臣肆胸臆生事邀功作邊隙可

卷二十九之三
憐三十七部民魚肉豈能分玉石君不見南詔安危在
一人莫道今無賽典赤

明

臨安秋江靜釣

參政王奎
謫戌
松陽

長江西來幾千里白浪飛流拍天起中有修鱗長比人
不入先生釣竿裏先生襟度足與娛直釣在意不在魚
要將清風蕩星斗不與怒濤同捲舒昨夜一絲醺寒月
今夜一絲拂飛雪舉頭傲睨天地裂目光夜射蛟鼉窟

先生釣竿幾許長先生經綸千丈強子陵桐江遇文叔
尚父渭水逢周王江山回首應非故世事茫茫難縷數
赤壁天空雁不來采石月明鯨已去乾坤上下清絕塵
天橫水白結冰銀先生有意投竿起歲月無情那待人

判山玩月

判山山上秋月明判山山下秋水清道人持杯待明月
氣壓太華吞滄溟嫦娥靚粧倚碧井照見琉璃幾千頃
興來吸盡金叵羅舞袖徘徊弄清影

道中望蕩山

逯 杲 懷慶

入關地平少邱坂旌旗微茫城尚遠碧水漁舟白日寒
黃塵旅店秋風晚半山佛寺鬱嵯峨樹色溪聲雲氣多
不得皈依此中住幾回馬首暫經過

登聚遠樓

主簿 謫戍平 顯 杭州

白日送客還南滇夜夢還踏滇池船連峰倒垂三百里
白雲水底行青天五華山上香風起萬點菱花墮秋水
僧遊海藏受齋歸小笠輕袍船一葦霜眉碧眼高結喉

揖余同登絕頂樓樓中古篆屈鼎足黃金揭榜蟠銀鈎
傾壺共灑醞酥汁東壁淋漓電光入扶桑亞風掀海立
金馬騰驤脫其繫攄虹聳見西浪風遙聞雞犬白雲中
羽人不謹碧雞籠躍出一朵青芙蓉芙蓉花開成碧藕
玉案流香旨於酒東北飛來鶴上仙云是商山採芝叟
苾芻厭喧寂坐久空牀卻作獅子吼獅子吼聲吼如雷
螺巖石扇勻而開招我題詩蒼翠壁呼童為掃夜明苔
膜拜其中金粟影珊瑚舌相青蓮臺因談空空論白業

分霞法喜清凉栝我時六人斷塵縛若將終身有斯樂
天雞振羽啼一聲下界奔濤滿松壑松濤撲面冷然驚
官街鐘鼓交鏗鏗烟霞已失嘯傲伴夢寐徒憶滇陽城
滇陽城渺在何許客歸應念平生語相思石上舊精魂
萬里蘿龕一燈雨

賦得滇池夜月

布衣
郭文
昆明

長天無雲山四清白月在水搖虛明冷極萬象鏡光裏
乾坤一色秋冥冥玉壺載酒遊空碧人在清涼水晶域

座中何郎湖海客醉眼卻嫌滇水窄飄飄書劍不可留
坐令樂事成離憂安得身如水與月千里萬里隨君舟

武定獅子巖

何年竺國青猿猊奮然掣斷黃金羈天龍聽法不暇捕
躍來萬里西南陞化為千尋之異石至今髮鬣青離披
千林松響訝哮吼半巖雲動疑奔馳勢凌羣山總獸伏
獨有碧雞金馬爭雄奇神僧佛客作狡獪特以招提鎮
其背霜鐘月磬聒不醒吐霧吞霞騁光怪山林疑是給

孤園樓閣幻成金色界寒飈吹處愈生威旭日臨時倍
增態我來未敢輕笑談只恐驚騰向雲外

登曠逸樓

巡撫鄭顥錢塘

上人棲迹雲霞中樓居背倚青芙蓉映簾花木四攢遶
深幽雅稱金仙宮古聞滇陽擅佳麗五華特秀西南叢
滄波遠引勢吞吐城闔俯瞰烟溟濛樓臺萬井互參列
浮屠百尺高凌空面前岡巒總奔赴嵯峨宛若君山峰

點蒼山

僉事童軒鄱陽

點蒼山色何奇哉芙蓉朵朵天邊開嶙峋直上九千仞
俯視羣岫皆蓓蕾夸娥不能移巨靈不能劈南風十日
吹不平但見雲開橫鐵壁琪花瑤草四時閒此景彷彿
非人間千年老雪消不盡龍湫六月生陰寒我欲乘風
升絕頂倒控蒼虬凌倒景黃鶴仙人手可招咫尺蓬萊
五雲境

泛舟歌

參政
朱應登

寶應

漱江江波翠蕭爽扁舟遠泛臨江上烟消日出意興殊

牙檣捩柁平如掌南方嚴冬氣仍煖馮夷擊鼓同歡賞
山黛石壁逶迤開蘋花荇葉參差長水鷗銜魚時出浦
宿鷺將雛不驚榜白雲不動青山移四面合沓排銀膀
須臾長風起天末寒氣颼颼振林莽驚濤駭浪倏怒號
神龍錦鯉紛來往人生憂樂頃刻異世事浮沉足深想
憂樂浮沉那可哀且將新酒溢金杯長江西南入交趾
馬援征行安在哉幾多掀揭回頭少古今偉絕俱塵埃
江流不管古今事明日江頭人復來

臨安春社行

楊慎

見前

臨安二月天氣暄滿城靚粧春服妍花簇旗亭錦圍巷
佛遊人嬉車馬闐少年社火燃燈寺埒材角妙紛紛至
公孫舞劍駭張筵宜僚弄丸驚楚市楊柳藏鴉白門晚
梅梁栖燕紅樓遠青山白日感羈遊翠掌清樽詎消遣
宛洛風光似夢中故園兄弟復西東醉歌茗芋月中去
請君莫唱思悲翁

觀大理武安王廟畫壁歌

武安王廟蒼山旁金生畫壁真擅長只今一百五十載
火旗雲馬神揚揚古來好手吾能說開元之中三昧絕
左衛將軍李思訓右丞才子王摩詰金生動筆思王李
古法不廢今罕比何時放遣來滇水尋奇亦遇蒼山址
乘興歛然掃素壁蛟龍抃舞長風起千年戰功猶昨日
颯爽英姿炯不死想見解衣磅礴時寂寞後代覓心知
蛛絲蟲網日凋壞賞者何人護者誰翻嗟古來才子蕪
沒亦何限感慨為爾擊節生遙悲

海風行

蒼山峽束蒼江口天梁中貫晴雷吼中有不斷之長風
衝波動林沙石走咫尺巔崖迴不分征馬長嘶客低首
我行其野歲仲春春寒野陰雲物屯病骨凌兢坐自躓
欲去未到先愁人山靈相假若有神纖蘿不動停飈塵
鳴鳥聲樂旅顏破僕夫笑語龐眉伸翻思往昔蘭臺直
被襟曾奮雌雄筆金門玉堂遠別來景差唐勒長相憶
飄蓬落葉向南荒憔悴榮華寧有常不學回風悲屈子

江邊愁結芰荷裳

寶井篇

彩石光珠從古重窈窕繁華急玩弄豈知兩片弱雲鬟
戴卻九夷重譯貢寶井曾聞道路賒蛇風蜃雨急天涯
馳傳千羣隨嫖姚披圖萬里逐輕車君不見永昌城南
寶井路七里亭前碗水鋪情知死別少生還妻子爺娘
泣相訴川長不聞遙哭聲但是黃沙起金霧潞江八灣
瘴氣多黃草壩連猛虎坡徧茅相對甘芝寨崩磧浮沙

曩轉河說有南牙山更惡怕頭漆齒號蠻莫光搖戛燈
與孟連啞瘴須臾無救藥莫勒江邊多地羊隊隊行行
入帳房紅藤纏足詔法女金葉填牙緬甸王回首滇雲
已萬里寶井前瞻猶望洋紫刺硬紅干鎰價真贗入眼
無高下得寶歸來似更生弔影驚魂夢猶怕吾聞崑崙
之山玉拂鵲慶雲之地金擲龜安得仙人縮地法寶井
移在長安街

惡氛行

金碧山前惡氛起賊馬來飲滇池水城西放火銀漢紅
炎焰城頭高十里兩重日暈圍白虹萬家仰首呼蒼穹
相顧慘然無顏色嗚呼寄命須臾中賊徒渾幾個枕戈
臨水臥我軍屯北門分明不敢過土酋脅盟來索官城
上無言騎堞看父老倉忙雙泣泗細說去冬尋甸事絃
急柱促柄倒持首禍今朝竟何自堂堂之陣誰主兵喁
喁公等皆儒生賊來不肯令出哨賊去但解擡空營豈
無雄武士奮身思一決咫尺轅門不敢前怒髮衝冠氣

填咽况聞千金逐日費連月公儲已傾竭上官抄掠盡
村園升天無梯地無穴熙皞閭閻踰百年太平官府真
神仙紫微迢迢華蓋遠虛將敲扑威窮邊邊隅一旦紛
解瓦喑鳴變作擎拳者喑鳴擎拳兩奈何君不見建武
年中任校尉又不見開元年中張虔陀

苴力橋垂柳篇

靈和殿前艷陽時忘憂館裏光風吹千門萬戶旌旗色
九陌三條雨露姿蒼涼苑日籠燕甸縹緲宮雲覆京縣

芳樹重重歸院迷
飄花點點臨池見
臨池歸院總仙曹
應制分題競彩毫
詔乘西第將軍馬
詩奪東方學士袍
金明綠暗留烟霧
舊燕新鶯喚朝暮
只知眉黛為君顰
肯信腰肢有人妬
從此沉淪萬里身
可堪憔悴四經春
支離散木甘時棄
攀折荒亭委路塵
搖落秋風上林遠
婆娑生意華年晚
腸斷關山明月樓
一聲橫笛清霜坂

霽虹橋

織鐵懸梯飛步驚
獨立縹緲青霄平
騰蛇遊霧瘴氛惡

孔雀飲江烟瀨清蘭津南度哀牢國蒲塞西連諸葛營
中原回首踰萬里懷古思歸何限情

宿金沙江

往年曾向嘉陵宿驛樓東畔闌干曲江聲徹夜動離愁
月色中天照幽獨豈意飄零瘴海頭嘉陵回首轉悠悠
江聲月色何堪說腸斷金沙萬里樓

賦得千山紅樹圖送楊茂之

蕭郎雅工金碧畫愛畫碧雞與金馬畫作千山紅樹圖

行色秋光兩瀟灑搖落深知宋玉悲登山臨水送將歸
丹林初曉清霜重紫谷斜陽赤燒微故人辭我故鄉去
滇樹遙遙接巴樹桑落他山共醉時楓香客路銷魂處
白首遐荒老未還流波落木慘離顏錦城紅樹那能見
千里隨君夢裏攀

三石篇

提學

張佳印 銅梁

大滇以西三巨石錯列荆榛對孤驛文彩天開海嶽圖
面面晶光盈十尺吁嗟此石生點蒼云誰置之古路旁

停車顧盼日將晏僕夫語罷泣數行往年天子新明堂
厥材萬國爭梯航燕山之石白勝玉何來此物勞要荒
守臣當日功名急檄書夜飛人屏息程途初不計山谿
男婦徵傭無漢棘鞭石難尋渤海神鑿山誰是金牛力
那許終朝尺寸移積屍道上紛如織中興令主堯舜資
一葦聖德超茅茨天門萬里竟不知幾使黔南無子遺
君不見旅葬古訓老臣策蒟醬雖甘亦何益三石磴研
風雨深千載行人增嘆惜

寶石謠

舉人 張 含 永昌

成化年中寶石重私家暗買官家用只在京師給帑銀
不索南夷作琛貢林寶石家海內聞雄商大賈集如雲
勅諭林家避科道恐有彈章阜囊到自從嘉靖丁亥歲
採買官臨永昌衛朝廷公道給官銀地方多事民憔悴
民憔悴將奈何驛路官亭虎豹多欽取旗開山岳搖鬻
男販婦民悲號到今一十四回內涕淚無聲肝膽碎成
化年嘉靖年天王明聖三皇肩獨憐絕域邊民苦滿眼

逃亡屋倒懸屋倒懸不得已為迫飢寒賊盜起山川城郭盡荒涼紛紛象馬窺封疆窺封疆撼邊域經年月日無顏色杞人憂天天不聽濁醪大醉明詩亭

石門山行

知府李元陽

太和

石門倚天千仞青花源巖夾春冥冥芝牆瑤洞杳莫測羽衣金節藏仙靈仙人乘鸞從此去石扇千年永不扃上有五城之絳闕雨暘祈報稱明馨我來窺門入不得遙尋石磴迂遊輶須臾得到洞天上拜謁虛皇禮列星

萬丈鐵崖無尺土溜泉直落聲丁丁清明下視不見底
白晝倏忽生雷霆綠潭翠壑有龍臥巖房石室穿鼪鼯
白鷗紫燕自嬌好奇花秀木何娉婷天生石槽釀碧水
盥沐淨者談黃庭援藟捫蘿興未極五梯回首十梯停
登高縱觀日已夕玉笋三峯破天碧白雲千頃盡遮山
不見人閒塵土迹便當從此訪蓬瀛手接浮邱醉金液

羅漢巖

湖上飛巖映波綠石壁插水山無足艤艇躋攀到上頭

下見湖光洗寒玉寒玉洶涌動席前二十萬頃涵雲烟
冥冥一鶴飛不去天際迴翔似有緣我聞羨門與偓佺
常騎皓鶴凌茫然得無知我有奇骨將期汗漫遊先天
須臾鶴去天雞唱長風吹予度層嶂路絕頻經海鵲巢
袂輕不用仙翁杖巖際高低刻應真遊客何人是後身
悵望雲輶久延佇六合有盡秋無垠古來賢達更何在
唯有此山常不改把酒臨風酹白雲浩歌一曲聲翻海
聲翻海非世情蛟鰐鯢鵬總失驚走卻海若與山精融

融灝氣虛空窄何必天台訪赤城

青華洞

青華洞深且密神工融鬼斧劈芒芒空壤閒此理不可
詰無乃混沌初闢時浩氣噓泡成幻質生平好奇膽方
壯一覽徑造無怵惕沿苔捫石豈容已宛若風雨投暗
室虛幽極處明自生時復有竅見天日祛昏破晦露真
機萬態千形難盡述蛟龍騰鳳凰跼麒麟遊虎豹逸有
如神僧跏趺面雪峰牛鬼蛇神獻奇術又如指石石成

羊繞劒風雷怒仍叱探幽歷險妙能窮一一收覽歸吾
筆山靈合斂藏陰怪已消黜乾坤正氣常在茲鎮靜天
西自無極行行洞口更升顛笑看扶桑紅日出

題蒼洱

尚寶
卿許穀上元

點蒼山高高插空靈光直射井鬼宮地軸遙開三百里
天險橫分十九峰茲山隆峻不可躡羣峰互吐瓊瑤色
朱夏長吟六月風蒼巖獨照千秋雪巖上高河鏡四圍
川川噴雪濺珠璣元波萬頃蛟龍臥白日一呼風雨飛

蘭滄江

巡撫黃中
遂昌

蓬婆之水下星峽怒濤直撼馮夷宮鐵柱齧蝕銷飛蜃
石壁突兀撐晴空博南初度歌猶怨諸葛重來路始通
江霧霏霏江樹暝飄飄疑是躡天風

星雲湖對月

參政侯必登
江川

玉露淒清秋氣涼星雲湖水澄明光近嶼含烟凝紫翠
遠山削壁摩清蒼水光山色渾相映萬里無雲碧天淨
俄驚龍女涌銀波忽訝嫦娥懸寶鏡嫦娥龍女竟何之

一片飛來印酒卮寒生几席冰壺徹影轉欄干玉漏遲
欄干几席此清輝曾向關前耀鐵衣寂寞長門砧杵急
歡娛金谷管絃低長門金谷總人寰寂寞歡娛自往還
惟有星雲湖上月年年如舊照青山

昆明池歌

巡撫
顧應祥 長興

昆明池延袤數百里千山萬山直自崑崙來諸山之水
匯於此相傳其水顛倒流滇池之名由此始左有金馬
山右有碧雞峰瀾漫浩瀚渺無際但見洪濤巨浪日夕

排蒼空青天忽驚白日起霹靂振撼蛟龍宮天吳水怪
九頭八足不可以名狀時復出沒於其中有時風恬波
浪息一碧萬頃開青銅其廣也如此胡為乎不在九域
之內不得與五湖七澤相爭雄神禹治水跡不到穆王
八駿難為窮漢主鑿池徒彷彿王褒將命何怱怱唐宋
以來各僭據聲教不與中國通天開景運聖人出一掃
海內羣邪空五服之外更五服俛首授命歸提封侏儻
椎結之類吾不知其幾千萬種禮樂不異車書同渺予

生當全勝日觀風兩度乘清驄古來多少豪傑士局於
偏安之世不得一洗硯磊胸百年過眼一彈指得此勝
覽真奇逢振衣獨立太華頂狂歌目斷孤飛鴻

瓊英仙洞

布衣
董難太和

茲山奇絕未可紀嶙峋有狀莫能比晦明幻化神物潛
章亥無心不到此山鬼啾啾風木號古藤絙索垂猿猱
幽禽百韻隔雲水熊羆落日呼其曹路斷弔橋立怪石
宛若晴虹長萬尺懸幢度索求他山颯颯天風吹羽翮

烟霞滿地仙源深仙蹟渺茫何處尋人似避秦雞犬外
松根履足來清音洞門深鎖桃千樹仙靈笑指桃源路
翠觀丹樓紫府圖興公欲作天台賦石花簇簇石乳香
龍飛鳳翥石笋長擊石拊石百獸舞鈞天樂奏聲鏗鏘
行廚有酒不輕與石髓初流復難取相看一笑酌一盃
自信仙緣吾與汝

紫溪山

舉人

俞汝欽

楚雄

陟重岡入盤谷幽奇別有神仙窟轉危磴登層臺爽氣

直從風雨來十里蒼松萬竿修竹怪石嵯峨虎豹蹲古
湫滄瀦龍蛇伏野花爛熳好鳥閒關遠峰拱揖碧水潺
湲境勝地偏人不到乃有涖伯子弄丸於其閒旭日當
樓方牀睡起無累故欣有得輒喜閒對輞川之圖靜觀
涑水之史或採藥於嶺外時垂釣於溪邊閑藉草而命
酌遂枕石而獨眠牧笛朝來樵歌暮往既泯世紛復絕
塵想忘形宇宙之中寄傲羲皇之上居奚宜莫如春千
峯改色百卉新揮塵老僧肅作禮載醪村叟醉相親又

奚宜莫如夏無蚋無蠅事亦詫梅雨中宵灑樹閒松風
一枕來窻下霜林五色忽逢秋岑寂空堦萬感休試向
青天搔首問腫朧皓月每當樓冬可賞更有雪一夕林
巒皓且潔不觀造化工豈識人為拙開門卻憶袁安貧
臥澤仍懷蘇武節山中風景四時佳有詩堪咏酒堪賒
過隙幾曾驚歲序憑軒時復飽烟霞吁嗟紫峰之可居
有若此更莫沉浮於閭里驅逐於天涯君不見陸渾元
德秀匡廬劉凝之雅懷原與溪山宜坦夷高潔真吾師

長嘯起攜如意舞莫嗟生晚不同時

遊雲津洞

巡按
李本固 固始

丈夫意氣凌高秋飛行八極隘齊州匹馬西南天際頭
貪奇到處為冥按昆明之左巖山陬中有仙窟結蜃樓
神藏鬼呵誰敢求我來始得探其幽洞口倒涵丹水流
長橋夭矯偃蒼虬振衣前度恣夷猶森森石笋排戈矛
側身一罅偃而僂手闢洪濛觸不周別有天地非人謀
列炬大詫爭先投奇奇怪怪爛不收萬頃芙蓉翔鷺鷗

百寶流蘇控玉鈎，千絲瓔珞懸燈毬。琪花瑤草紛相糝，
石髓天漿旨且柔。瓊瑋陸離睂人眸，烟花繚繞紫雲浮。
髣髴洪崖拍浮邱，驂駕白鹿與青牛。鸞回鳳舞彈箜篌，
步虛歌來音韻遒。恍疑臨風到十洲，俯首塵世如蜉蝣。
洞天深處水悠悠，欲往從之道阻修。恨無太乙蓮葉舟，
四顧蕭然不可留。卻尋歸路吟且謳，此日真成汗漫游。
散髮箕踞倒玉甌，劃然長嘯山鬼愁。神仙本是英雄儔，
蓬萊清淺不盈杯。齷齪富貴安足籌，棄之於我如浮沤。

向平婚嫁幾時休
松風萬壑來颼颼

天生橋觀瀑

巡按毛堪
吳縣

天生片石不盈尺
橫放山腰接山脈
側身仰望點蒼高
俯瞰懸崖如斧劈
一隙中飛萬斛珠
千層雪浪紛如席
梅花點點襲人裾
錯落瑤華良可惜
馬過峻坂鳴蕭蕭
旁睨行人多辟易
變幻神奇那可常
茲山終古無今昔
我來對此融心神
颯颯清風生兩腋
劃然一嘯四山開
浪涌波湍天地坼
徘徊此際信雄哉
萬里驅車何太迫

靜觀造化豈人工吁嗟久矣為形役黃石空傳佐漢書
商山詎解安儲策諸葛層城自古奇不及天生一片石
吾儕擾擾亦奚為水闊山空魚鳥適閒來攜酒坐橋邊
逢著樵夫且對弈

點蒼山歌

副使 王士性 臨海

點蒼山高躡空連峯十九如挂弓峰峰流泉落澗底下
浸榆葉函山東高山橫雪照人眼六月吹墮隨罡風寒
風飛翠迸馬首太陰顯氣摩蒼穹我聞點蒼有奇石胡

事山蒼石還白豈是陰崖太古雪化作瑤華點空碧玉
宇瑤樓互終古影落榆河驚水府驪龍弄珠蛟起舞吐
炬燃天作風雨洪濤不沒大鶴洲瞥然大地如欲浮四
時變態更譎幻深山巨澤良悠悠我欲乘風御列缺排
雲直踏中峰裂珊瑚出水月未高倦來且嚼山頭雪

雞足山歌

僉事

鄧原岳

閩縣

葉榆水從山腳流點蒼雞足皆神邱東西對峙爭奇絕
翩翩靈跡垂千秋我聞雞足之山原淨土迦葉授衣即

其處禪宗正印信難求釋氏遺踪或可覩相傳八月佛
放光輪囷五色還非常琳宮紺宇不知數浮屠寶剎凌
蒼蒼我來登覽多所歷烟霧冥冥恍相失披逕先尋兜
率庵捫蘿直上袈裟石江風吹雲雨如注猢猻梯滑不
可度大悲閣在山之巔下視羣峰互吞吐須臾雨散雲
亦開指點遙山青翠來麗江雪山白照眼茫茫洱海浮
銀牀捨身崖峭多虎跡仙碁石山草花碧拜佛巖懸千
仞岡曹溪泉冷成丹液華首門扃亦已久昔時夜鉢今

何有洞天寂寂雲四封層巒半壁苔衣厚俯矚下方亦可憐幻成百里兜羅綿我心亦作空明想便知鉢裏開青蓮山雨初收還吐雲白毫光裏氣氤氲偶從洞府尋真誥便叩天門謁帝君旛影摩空虹掩映香烟吹霧鶴繽紛塵心未盡空惆悵絳節瑤笙香不聞

昆池篇

尚書
雷躍龍 新興

漢家欲擬昆明池油幢繡鵠晚風吹於今池上波猶闊枉度清宵鼓角時五更鼓角三更歇石鯨驤首窺明月

野鳬畫鷁寂無聲十里芙蓉連夜發芙蓉萬朵柳千條
雙堤一鏡照花嬌三三五五菱歌女暮暮朝朝燕子橋
燕子橋南烟馥馥畫樓臺水霧縠明霞水際鬱空蒼
綠鬟青黛瀟湘竹瀟湘昨夜雨茫茫不分昆湖杜若芳
日月悠悠閒出沒溪山歷歷自笙簧笙簧奏罷長天碧
晴雪噴厓螺髻白太華峯頂揖桐君玉案山頭淹羽客
羽客淹流玉案愁海風吹斷五湖秋膩香春粉栖黃蝶
白鹿青莎傍彩鷗彩鷗初浴青波暖荇帶蘅裳流艷滿

九十七泉瓊乳長五十萬頃瑤華短瑤華丹轂會軒朱
玉筍金蓮檻鳳雛遠遍碧扉仍霧鎖醉餘紅樹倩烟扶
烟扶紅樹嵐扶鶴露浥胭脂堆翠萼四百八十寺雲橫
飛來片片歸晴壑晴壑霏微帶遠鐘曹溪鉢底臥蒼龍
朱宮絳闕疑蛟室銀濤雪浪拍虬松雪浪銀濤蘭蕙汙
荻蘆瑟瑟珊瑚紫鞮韞傳白苧村水晶簾挂桃花里
桃花千樹武陵溪否亦羅浮月底迷鴛鴦錦水秋光冷
鸚鵡芳洲曙色低芳洲錦水傷南浦十二峯西空暮雨

解珮江臯憶楚妃懷仙渡口思交甫渡口懷仙去不還
吹簫人在野萸灣我欲從之橫別渚微風落日水潺潺
君不見朝川圖鑑湖曲處孤山梅萼綠又不見潯江
悄歸帆杳徒悲天際孤鴻遠何似泛星槎歌窈窕銀河
清淺寒光皎盈盈一水兩心懸年年照徹湖天曉

登羅漢寺歌

提學楊師孔廬陵

誰鞭太古一片石縹緲下浸昆明坼巔岉突兀古宿尊
袈裟靜染天雲碧云自鴻濛入定來日月跳波雙眼開

等閒一坐三千劫風輪石火無纖埃攜將托鉢置天涯
一滴醍醐萬頃霞浩浩驚濤翻不定毒龍靜制深無譁
化城蘭若逗空見鬼斧劈雲開素練紺殿璇宮青壁巢
覺路天開爭一線俯矚虛無只見水白毫隱映空明裏
鐘聲遠激海鷗心峯陰倒幻蓮花蕊振衣卓錫搏空起
跨鶴飛來一萬里旋采松花醉紫霞指餐石竅青泥髓
悟來且證酒中禪芥子須彌未剖前無縫法門何用地
到來彼岸不須船箇中消息向誰求海月初生水倒流

共君細話三生石羅漢峰高亦點頭

秀山桃花溪行

閩應乾

通海

清溪南山麓溪逕盤春谷桃花三十樹二月一茅屋老
樹花淡紅初蕊赤如瞳顏色閒相照碧柳搖溪東我來
看花怕花落昨夜大風吼雲壑尋到溪邊問流水花片
不曾遭風掠萬物榮枯各有天白沙精湛小龍泉穿花
樹底坐泉石眼空世俗便神仙樹葉渡口落星岡千花
萬水飛春觴雙湖我已具舟航望望江南思蒼茫

星回節

失名

滇中六月廿四日燒松火雲光霽霽脂流滿地香徹天
萬家鐘磬聲寒栗輟春罷市虔祭賽生啖牛羊口血溢
云是當時六詔強九十九部蠶食亡同姓六人齊稱王
犬豕寧保鴻鴈行鄧睽詔主推豐咩浪穹施浪稱三浪
中惟鄧睽差仁柔夫人慈善禮法優奸雄叵測皮羅閣
笙歌召會松明樓脫簪牽裾不得留鐵釧約臂紅淚流
阿奴火攻酒半發炎鳥蟹煨飛神邱殘蛾埃煤一箕掃

精鋼融腕遺骸收貽來琴瑟同心結謾許同衾誓同穴
祁連塚上血流霞娘子軍旂光奪雪死守何異巡遠堅
忍餓甘共夷齊潔南詔羞慚心尚存妃封寧北城德源
至今生氣凜白日赤龍黯澹風烟昏一炬摧殘萬劫灰
瓊瑤臺上招星迴不敢舉火竟生食反燔燄助夫人哀
喋血誓嚙仇讎肉生吞活剥遍山谷烟林白鷗湘江龍
寒食競渡中外從不謂蠻烟炳星日令節直追前賢蹤
吁嗟夜郎牂牁化日餘貞禽羽族猶堪書後宮寵冠晉

羊后司馬家兒笑不如

本朝

龍潭曲二首

布政彭而述 南陽

昆明城東北十五里小山數四古剎厯落老樹蒼
藤虧蔽日月潭出其麓深綠無底岸有楊柳孤祠
頽然有龍其下偶同藩伯李嵩岑臬司崔修庵孔
守聶令諸子載酒來遊讀壁書感之因作此曲

盤渦沉綠深無底中有龍孫與龍子涌腥跳沫八千仞
陰風窸窣萬山屹蝸涎敗壁血光紅靈旗白馬塞虛空
峩冠長劍氣如虹左右環珮響玲瓏匊葉珠玑被青驄

綠粉掃天日光薄鬼火如漆照哀壑池館楊柳人森寒
黃昏翠幕入殘郭

三韓鐵馬蛇鱗甲關嶺南來雷電雲昆明海水潑天黑
大家奔出緬甸國王侯落魄失枝梧或降或走只須臾
誓死倔强惟老儒攜妻抱子向天呼碧潭洩洄深難測
琉璃堆成蛟龍室垂楊倒影走遊魚一門大小入者七
白日屍浮水不流骨肉指爪相綢繆日月慘黯天地暗
野裳青火衰草畔蛛網遊絲纏舊壁破簷卑濕蟲淅瀝

霜華缺月下鐘聲時見陰魂結隊行

清溪洞

侍郎趙士麟河陽

巨靈何年闢此宅懸崖蹴浪高百尺仰面蛇行未易探
側身猿挂不容掖以火燭之心始驚虎豹縱橫蛇龍立
更有仙佛乘雲濤香幢寶蓋紛絡繹徐視方知石結成
巖竇涓涓凝玉液再進泥濘不可行惟聞足下泉聲溢
清溪洞可棲真在人境鮮囂塵但恐他日驅車過風雨
迷離莫問津

庚午十月遊黑龍潭擬古

總督

范承勳

奉天

蛇山蜿蜒來西蜀奔入滇雲頻起伏赤磧灰堆互千重
昆明萬頃環成綠欲從盤龍探上流殘荷衰柳度田疇
鹿場積穫高於屋老農擊壤歌有秋賓從攜琴踵相接
九十九泉一日涉荒郊狐兔已無蹤羈鷹勒馬看紅葉
白龍潭復黑龍潭真人朝帝龍為驂乞封還來臥茲窟
雲雷曉夜停天南道人出自長春院詡詡呼龍與人見
麥盤在手白魚跳何物悠然遊水面世人訝為老龍孫

紛投香餌總不吞雙眼射波光吐日黃雲涌水何沄沄
滇中神奇不勝載邪龍挾雨白晝晦此閒神物獨精靈
能將大地沾汪濊我為釀酒酌老龍鼓琴潭面吟山松
振衣更欲向千仞直踏雲頭五老峯潭中山水陰陽剖
觀極分明有五叟迢迢攬轡望京華仗劍天邊依北斗

碧峽書院歌弔楊升庵

侍郎田雯
德州

楊升庵先生者新都才子世廟名家溯家學之淵
源以正叔考亭自守爭朝端之典禮與君實禹玉
同歸父也解組明農子乃抗辭仗節哀號徹殿陛
幾致空朝謫竄赴蠻荒何愁萬里真國家養士之

盛斯臣子守義之榮彼始以尊親為辭亦曰誰無人父而究致豐禰貽誚豈緊古有典章在豐嚴亦復何心即張桂不虞至此嘆老夫其耄矣編摩於憂患者七旬望君門以遠兮教澤乃浸淫乎六詔酒旗戲鼓流浪餘生剝水殘山品題到處豐才畲遇著嘉名於蘭臺石室之編敗壁頽垣留遺跡於蔓草荒烟之際惟我蘇公范先生采風問俗弔古興懷憶左順門跪伏之秋正高王父共事之日永言祖德當年之丰采誰同撫此芳踪先世之忠貞宛覩恍風流以如昨寧云前代之遙對榛莽而堪憐尚有毛公之字人稱竝美德固有鄰以彼二百餘人為始為終非無翻覆之子獨此西南荒徼一生一死羣傳激烈之名惟遺教之在人久立祠以風世山川如故依然爭流競秀之觀廟貌安存不無世遠年湮之感芟其蕪穢爰復新之薦以蘋蘩為可繼也地仍難麓因夢魂所熟流連頗以碧峽

借題贈之留舊額君子之澤未斬滇人之慕尤長
死者有知神其永戀望青雲衣兮百世豈有離憂
遇潘陽公於九京亦應含笑典型不朽
朽功德滋深用綴篇章聿伸仰止

堞風茵露哀牢疆山川瘡痍難禁當新都公子老成客
孤臣萬里堪悲傷年七十二金雞香白頭搖落西南羌
當時世廟議大禮撼門痛哭千夫強仗節抗疏言矯矯
手觸蠆尾投蠻荒伊川不作晦翁逝今昔濮議誰斟量
先生云臣所執者大禮未定大獄起批鱗折檻空激昂
程頤朱熹之論
璫萼諸人恥同列詎知作俑來豐坊先生云學術不同
議論亦異臣恥與

夢等
同列

明堂秋饗復聚訟餘毒林甫爭拍張

謂分宜也

嗚呼先

生遂不返箐酋洞獠羣相將水弩含沙火雲熱天教老
噉紅檳榔吳粉傅面兩了髻簪花擁伎何徜徉都盧倒
吹潑醉墨棘兒觀者如堵牆白狼噉跳烏爨弄百斛文
鼎非尋常雷礪光焰留南詔好手濃煎班馬香我撫殘
篇羅几案如嗅艾納兼都梁藻彩標格稱絕調矧於大
節尤堂堂海莊故墟碧雞麓猩猩白晝啼書倉巾杖逍
遙鬚眉古圖畫遺像生光鉉竹檜一徑夾流水菊乾楓

落寒雲僵潮州儋耳同一轍祠廟鼎鼐摩青蒼小子作
蠶自裹縛形骸枯槁眠黔陽焉得升堦更翦紙招魂歸
送蠶鳧鄉高吟幻夢誰憐句杲杲冬日朝在房

先生詩
云遠想

生遂成幻夢縱令死去有
誰憐月令十月日在房

青華洞

提學
吳自肅 見前

驅車驅車洱海旁盈盈一水烟微茫嵯峨紺殿朝朝陽
登樓遙望山蒼蒼側聞古洞歌雲房躡屐從之心徜徉
古色斑剥飛青黃入門骨冷神清涼後先燃炬紛成行

驚魂駭目呼媧皇五丁巨靈開洪荒能為造化呈文章
上直羣聖來仙幢錯落車馬聞騰驤獅蹲虎踞形飛揚
向人作勢爪牙張美人隱隱芙蓉粧珊瑚叢架園仙牀
氤氲石髓沾衣裳鏗鞳互響聲鏗鏘前人留句爭輝煌
誰堪獨步誇詞場我來四顧生徬徨吁嗟人世多面牆

白夫謠

輿夫輿夫生南滇盤雲渡嶺如登天羊皮覆背見餘體
面如菜色生煤烟徒步驚看痛欲絕况復有物磨其肩

晨興車過永平道老稚嘈雜來山前
羣持炊餅爭相餉
呼兒呼父聲顛連又見往來行路者
驅同牛馬時加鞭
吁嗟乎以貴役賤分應爾車中我見
猶深憐彼雖蚩蚩
亦人子以賤虐賤胡為然

登太華山寺

知府
丁
煒
晉江

山舊有寺頗廢范制府
鼎建撰刻太華紀勝

我昔曾經西華嶽三峯秀削森如斲
玉女明星插漢高
芙蓉去天纔一握蹉跎無計恣躋攀
攬轡狂歌神齷齪

謁來滇海已三年今朝乍陟太華巔入門雙眼眩丹碧
應真龍象方新鮮琳宮結構仗節鉞隱然福地需名賢
振衣直造諸天境激灩湖光開萬頃是時過雨洗烟鬟
西子新粧臨鏡靚漁父釣艇亞蒹葭夷猶不礙鷺鷥靜
翠鴛金馬送青來紛紛誰暇窮要領落日沉波散綺霞
潏潏駘蕩驚龍蛇盪胸奇景渺難狀憑闌拊掌徒吁嗟
吁嗟兮苴蘭素號仙靈窟開闢何人為闡發子長空自
傳西南忍使名山終汨沒摩挲碑版嘆高文葛巾欲帶

昆明雲擬搨銀鈎千萬紙寄與域中禽向共知聞臥遊
勿忘太華美作配顥靈從此始

蒼山廟古杉行

知縣

張泰交

陽城

點蒼廟前有古杉摩日干霄高難攀鐵骨霜皮蒼翠枝
枝拂山頭根抱巖風起濤翻震萬壑歲暮深寒夜不落
雷雨崩空倒百川振動虬龍怒拏攫山多松柏古且奇
似茲獨樹誰能齊植自何年更何人混沌日月安可知
昔聞匠工揮斧斲斧纔舉手忽傷足心魄驚飛信有神

用保天年蟠地軸七星昔傍麻姑壇傳說今已全摧殘
惟茲十九峯中峯靈護此木蒼團團喜洲唐梅老幹矯
蘭峯唐杉矗塵表看君自是千歲顏較他年齒誰大小
噫吁嘻武侯鐵柱今安歸蒙段宮室亦灰飛幾經太平
幾離亂君獨亭亭無是非絕出煙氛挺介節過者拱立
無敢褻儼如乾坤一偉人經歷撐持百不折余來幾度
瞻其旁今日蘋蘩春薦香祝神更加培護無翦伐天家
正須此材為棟梁

南莊道中

侍講

許賀來

石屏

南中十里走平陸，遠近村浮烟樹綠。
曠莽原田半荒蕪，隴上草青閒臥犢。
馬首西風送午涼，橋外泉聲咽綠竹。
半實半秀稻花香，不雨不晴雲斷續。
蒼茫何處是龍山，隱見樓臺攢古木。
此閒幽寂可栖真，擬向峯巔結茆屋。
秀山古柏

督學

魏方泰

廣昌

天地古氣伐欲盡，秀山老柏猶崢嶸。
孤樹半霄青未了，落落不爭桃李榮。
我來湧金憩柏下，雙湖雨滌流雲英。

蒼虬攫雲撼大颶遙空颯沓餘秋聲

秀山茶花行

滇中四時春不斷山行日月褰帳看絕倫最是秀山茶
彷彿朱霞燦天半七十二種各天嬌卷瓣分心作意嬌
密葉真成青幄幔臨花偏愛軟枝條寶花玩月飄輕倩
更聞朵朵隨風轉到地猶同向日葵不教泥滓浣花面
自從初夏已含胎破臘驚看共蚤梅一花能耐經旬綻
一樹能經兩月開讀書寒士娛清暇數枝分種難窻下

聊學郭駝供筆資，售向人間無高價。豪家競費賞花錢，牡丹富貴芍藥妍。寂寞自開還自落，無人攜酒此花前。我今為爾澆醺醖，盃大紅毬喜不俗。繞樹日長千百迴，夜深還復燒高燭。高燭頻燒喚奈何，金罇莫惜醉時歌。有客座中忽太息，不知何事感生多。客言海棠雖嬌嫩，香氣有無何足論。有香未到十分憐，無香寧抵十分恨。憐轉深兮恨轉深，此花植得費沉吟。可惜當年人不見，空抱烟村一片心。我亦雅同彭氏趣，不計無香廁花數。

憐到此花恨不生轉恨客情太膠固小枝覓得兩三盆
準擬攜歸溪上村清風也自慚投硯隔霧不圖老眼昏
更酬司花祝不已願花長似昆明美江北江南總是春
莫教橋去翻成枳

禹碑歌

主事 段 昕 安寧

禹碑即韓昌黎詩所稱字青石赤鸞飄鳳泊者當時亦傳聞於道士之口故有千梭萬索之句未嘗親見其碑也然同時劉夢得詩亦有嘗聞祝融峯上有神禹銘古石琅玕姿祕文螭虎形之語則此碑實有之獨惜好古者按索不得致疑以傳疑東坡云岫嶸何須到韓公浪自悲及朱紫陽遊衡嶽

不見此碑著韓文考異遂謂韓詩為傳聞之誤嗚呼禹聖人也禹碑神物也有見之者有傳之者有按索不遇而疑之者其顯晦當亦有時耶明嘉靖間吾鄉碧泉張先生撫蜀歸出榻本以示升庵先生云得之衡山者共七十七字篆皆龜龍文人多不能曉升庵乃象形會意句為之譯惟四字未解夜夢黃衣魚首人曰此南瀆衍亭也禹碑自是有全文矣遂摹於州之法華寺後石壁照原本鐫之自明至今又將二百餘年字俱完好好古者每摩挲不能去余生韓公後將千年矣唐宋諸先生所不得見者余乃得於咫尺之地可不謂幸歟韓蘇石鼓詩光燄萬丈照耀千古余才薄劣萬萬不逮古人然見神物而喜傳之不自知其手筆之凡近也因作歌以繼升庵先生之後云

岫嶺山尖神禹碑字青石赤形模奇

韓句誰何道士偶一

見昌黎徒作猿猱悲令人搜索不可得紫陽考異空傳
疑芙蓉紫蓋開扁鑰祕文靈寶無人窺雲封榛塞幾千
載龍威丈人知復誰那知神物有時出鸞飄鳳泊天南
陲碧泉老人探笥篋元圭文命光陸離新都成客識奇
字象形會意按根枝神人指授盡了了補天巨手非人
為七十七字鏤金薤雷霆騰耀星斗垂寒山石擘巨靈
掌鬼工天巧司斤鎚太乙下視舌上橋高撐天柱支坤
維鱗者鬣者毛介者龜龍蟲鳥魚虹螭祖禰軒頡孫史

猶三古以後無其辭憶昔昏墊警神聖司空幹蠱承帝
咨蒼水使者授金簡驅神役怪孽支祈勞形忘家竄鳥
獸鬱塞昏徙萬國治獄瀆平定衣食備至今水土歌雍
熙此石此字天地寶祝融呵護天留遺鴻都人喧石經
蔡嶧山火燎丞相斯六書八體妙雕繪奇古獨數石鼓
詩對此紛紛悉傾倒五都市物見鼎彝西南僻遠少文
獻文章大塊無如茲晶光閃爍留晚照
晚照安寧八景之一勒石碑處
金碧鬼神常肩隨生世太晚不足恨古人不見我見之

坐臥摩挲手刻劃無異身在鑄鼎時剡苔剔蘚補齧缺
體勢飛動神淋漓字青石赤形模奇峒嶺山尖神禹碑

弔甘忠果

檢討

王思訓

昆明

長鯨激浪昆池洩萬頃翻成龍戰血鬚鬣飛上碧雞山
頭觸西南天柱折霧作蚩尤將士迷大僚泥首遭燃臍
蒼鵝匝地銅馬健花叢蹂破金稜堤霜輦振動幾千里
前突鷄軍尹與史靈寶不戰哥舒降睢陽誰効中丞死
重臣抗節獨有公戟張頰髮聲靈霍誓掃妖氛難徒手

呼天灑血黔山紅臨淮齧指少南八無與守者妾空殺

羽檄親馳出調師欲以精誠格所轄

時公聞變將守城拒賊而將士已皆

從逆勢莫能支因謀馳赴鎮遠扼抗咽喉調集楚師為恢復計

單騎提攜穉子孤何善

雅圖奔相扶苦飲三日豺虎血溯從澗水穿崎嶇但期

調集楚衆力枕戈滅此方朝食遍地腥羶蜂蟻多橋上

弓刀樹如棘空有浩氣絕外援舌在不愧顏平原隔河

罵賊怒清涌沙洲徒卒聞斯言從容步至吉祥寺北望

再拜畢臣志幼兒引頸兩客隨笑赴重泉事不二江臯

亂石埋幽魂鵲啼猿叫愁鴟蹲天地黯慘日光薄靈精
貫月悲黃昏大兵南下靖醜孽先闢蓬蒿尋壯烈傲骨
崢嶸護鬼神握拳透爪皆猶裂九重動色咨廷評錫
以忠果名錚錚羣生享比竹王墓踏歌夔鼓吹蘆笙滇
人猶不忘厚德築以佳城植松柏哀鳴楚些曰歸來絮
酒登高招毅魄貞臣之後世其昌繼麾節鉞臨巖疆過
廟挽思暮雲濕專祠東郭升馨香在昔子充不辱使干
秋奇節芳蘭芷有人慟哭記滇南復見今時王孝子喬

木歷歷烟蒼蒼高山仰止烟水長
豈必羅池賽神降丹生荔子芭蕉
黃吁嗟老漚逆天道七國因之不能
保溪毛澗藻薦孤忠何處吳宮問花
草

巨靈峽

知州周鉞長洲

巨靈作力不可當劈開太華分首陽
高掌遠蹠有零落飛此雲霞墮杳茫
羅漢壁上斗絕處蘄焉突兀懸危岡
天斤鬼斧未施巧多事欲試百煉鋼
長柯十尋漫擊培猿綠猱陟難跳踉
徒有勝情乏勝具愛奇入骨空徬徨

無階可升自硨磲騁目亦足凌青蒼安用拙工費頑鈍
乃使磊砢遭拍張

恩樂縣歌

總督

鄂爾泰 滿洲

星連井鬼古荒服蒙氏自王詔分六馬龍他郎甸殊名
通呼者島夷所熟更為猛摩隸銀生阿剌據之蒙日蹙
終唐迄宋六百年蒙亡段繼那能復元至元閒轄元江
阿哀阿羅歸簿錄初授軍民長官司蒙統蒙魯世夷目
洪武內附仍頭銜者樂甸邑比湯沐來者木版賜姓刀

戶領幾千丁蕃育祖孫父子十七傳我朝四代歸臣

僕雍正丙午清邊疆順者安恬逆者戮萬寨百蠻皆傾

誠仰識天心聯斗獨

聯斗刀氏之後

精悍由來是健兒銜壁牽

羊頻首伏只求改土署流官不愛腥羶愛薄粥上章代

奏達天門榮頒官帶九品祿升甸為縣賜嘉名詔

傳恩樂人爭讀縣衙恰對文筆山地脈受自碧松麓松

濤拂几筆陣雄遙望一峯賽雞足

三字山名

繡嶂重圍似屏

宸老梅山橫出凹巴腹

夷呼老梅山為凹巴山

霓旌炫日三家

坡

立營於此

軍容壯麗邊聲肅景來

水名

河源自景東哈嘯嚕

三字景東水名魯馬所出

鞭魯馬

水名

瀆浦麻托寫

二水名

出鎮沅七鄉

田疇同霑霖漢人不及夷人多分為五種別其族一種

擺夷刀姓繁性喜憑高居重屋稱父為爸母為咩艾男

葉女相呼逐衣著多與漢人同偏好花巾頭上覆女子

綰髮青幅纏短衣線帶羞綺縠端重整齊愛桶裙翻嗤

紉袴太澀縮婚盟亦藉媒妁言茶鹽通好兩姓睦

用茶鹽薑

糖等作聘催縫布袋賀新年拋擲空中逐百福六月廿四光

燭天燃炬鬪火雲烟轟剝腥醢肉劇相呼何必繁絃勞
絲竹家家好鬼不信醫吉凶疾病無須卜也教子弟學
讀書但願留淳化其樸一種蒲蠻似擺夷譬如五穀種
與黍若非黥黠面目殊直欲指馬呼為鹿一種窩泥好
樓居屋角開門何跼蹐王曾田畢與劉彭方之漢姓無
差繆蓋頭四角彩線垂一方青布人何淑別嫌亦惡同
姓婚親迎遠避蟲蛇值始喪殺豬復砍牛孝子心悲腸
轉轂嫻朋入山木作槽舉室哀吟向槽哭筮日殮之葬

山阮忍效狸首歌登木近日雅聞絃誦音曲跼延師誇
入塾一種古棕性格懸不耕水田種山穀巖栖嗜酒訪
街期扶醉歸來喜可掬佳人辮髮不橫釵笑殺簪珥藏
糴簾納聘納采銀與牛歌跳吹笙傾百斛卻嫌牀蓐高
生寒環火同眠儉且暝亡者既焚骨不收撮土低埋嗟
何速一種猱獾豪姓誰羅馬張楊比潘陸山居不愛石
作牆環以木塊周四隕牛豕滿欄雞滿柵體肥骨細工
牲畜麻苧宜涼羊皮溫世閒那怯有寒燠閨中慣喜著

長衣裙穿百摺拖六幅束髻懸彩類窩泥冰上老人往
而復門外青青高結蓬肥肉多煮酒多漉新婦蓬下會
佳兒攜手跳歌心輾輓俗尚巫鬼構松亭搖旗呐喊同
尸祝屋後喧闐屋前聞宰殺犬羊等雛驚屍燒形化骨
不銷貯以甕瓶葬崖谷結茅忽又向他山啓瓶別擡蹠
躍築天生夷獠各不齊風猶近古渾樸遯仁義禮智忠
信鄉六鄉名願汝同心歸雖穆勿須學劍但讀書要知賣
力去買犢讀書耕田享太平恩樂無疆子孫毓作此好

歌敬聽之什襲以珍藏之匱

趙州席歌

教授

趙

淳

趙州

趙州席密同竹簟堪永夕無限辛勤織得成孤燈促織
鳴東壁困來祇自藉蒲眠留取精良輸戶役自入朱門
藉錦衾恣睢蹴踏誰復惜

補遺

本朝

乾陽山遠眺

五言古

知府

張漢

石屏

偶從山背行南訪乾陽面路轉出崇岡明湖橫一鑑起
欲凌風翔長空拙羽翰洞口俯長川高卑陳所見直俯
北山趾橫俯南山尾山勢東南來跳擲層波裏支壑與
蔓峯駢拇還枝指勢欲穿湖來山麓畏觸抵山島忽在
原孤城忽在汴斗大一州橫微茫見城市廣此視九州

九點煙猶此縱目西復西秀山接杖履我家華表柱玉
立隨雲起迢迢白雲閒情深慰陟屺振衣萬峯前臥遊
終百里天垂一冪青離天可盈咫洞始何年開洞終何
年圯終始不須論洞虛何所倚古來幾遊人古人長已
矣後人續游觀遞遊何日止我輩有今日茲遊為情使
請申今日歡山尊起重洗

雲南通志卷二十九之十三